

CONVIVENZA

Chabgia enstagl da bognera

FADRINA HOFMANN

Ina bognera cun pesins, quai è mes giavisch anc betg accumulì. In model da quella bognera da siemis hai jau survegnì da mes char ina giada sin natalizi. Ella ha schizunt pes dad aur. En quella bognera giaschan culaunas e mia ura. En la dregga bognera less jau x-ina giada lura giaschair. Jau ma ves gia ina saira d'enviern en l'aua chauda cun blera stgima odurusa fin si sut il culiez, en maun in cudesch, al radio musica patgifica. Il paradis sin terra.

Il lieu per la bognera è gia decidì, igl è era cler che la bognera vegn ad esser blaua turchis cun pes dad aur sco tschattas da liun. Ussa datti be in problem en connex cun la realisaziun da mes giavisch decadent – bun, atgnamain èsi dus problems: Per l'ina ma mancan ils meds finansials per ina tala installaziun esclusiva, per l'otra è il lieu, nua che jau vuless metter mia bognera actualmain anc occupà. E quai na vegn betg a sa midar ils proxims onns.

Enstagl da mia bognera cun pesins desiderada datti en noss bogn numnadain ina gronda chabgia per trais portgets da mar. La surfatscha da la chabgia è circa uschè gronda sco quella d'ina bella bognera – ina sort villa da portgets da mar dimena. La chabgia ed ils trais animalets èn noss project da corona ed ils animalets vivan dapi in onn tar nus. Polly, Filou e Joy appartegnan a mes uffants, vi-



van la stad en curtin e l'enviern en noss bogn – apunta exact là, nua che jau m'imaginesch mia bognera cun pesins.

Uschia è quai mintgant cun ils giavischs: Ins vuless ina bognera cun pes dad aur e survegn ina chabgia da portgets da mar. Nagut cun odurs exoticas dad essenzas da bogn, per cunter savuri da fain e strom frestg u tut tenor quants dis ch'èn passads dapi che la chabgia è vegnida pulida, spizzi lura propi in zic da stalla.

In proverbi di: «Primo daventa tut auter e secundo sco ch'ins pensa.» Gea, uschia è quai propi. Jau n'avess mai pensà che jau vivia ina giada puspè en la medema chasa sco durant mia uffanza. Jau n'avess era betg pensà che jau surpiglia bleras chaussas da mes geniturs en mia educaziun. Ed oravant tut n'avess jau mai pensà che jau schess ina giada la medema frasa terribla sco mes geniturs: «Na, nus na cumprain betg in poni.»

Sco in déjà-vu è stada questa situaziun cun mia figlia. Ella turna fortunada d'ina ura da chavaltgar e raquinta cun blera compassiun d'in poni che na po betg pli restar tar ses possessur e che tschertga urgentamain in nov dachasa. «Mamma, ti dis adina ch'ins stoppia gidar in l'auter. Ti has bain era gugent animals. Quel poni stess uschè bain tar nus.» I suonda l'egliada consternada sin mes: «Quai na va simplamain betg.» I suondan larmas e suenter las larmas anc reproschas. Quai enconusch jau tut da mamezza. Era cun la proposta da fabritgar ina stalla sut la terrassa aveva jau gia argumentà avant 30 onns. E sco jau quella giada ha era mia figlia stuì acceptar che betg mintga giavisch na sa lascha adina realisar – perquai ch'i mancan il lieu, il temp, u apunta ils raps.

Cun quai fissan nus puspè enavos tar mia bognera blaua turchis cun pesins dad aur. Jau n'hai anc betg dà si il siemi da pudair sfunsar in di en mia oasa da recreaziun persunala. Il giavisch è be vegnì spustà per in pèr onns. Mintgant èsi da far in sacrifici en la vita. En mes cas vul quai dir: chabgia da portget da mar empè da bognera cun pesins.

Fadrina Hofmann è redactura tar la «Südostschweiz» e viva cun sia famiglia a Scuol.

La convivenza cumpara mintgamai igl glindesi en La Quotidiana ed en La Südostschweiz.